

ՀԱՅ-ՈՒԿՐԱԻՆԱԿԱՆ ՊԱՏՄԱԿԱՆ ԿԱՊԵՐԻՆ ՆՎԻՐՎԱԾ ԳԻՏԱԿԱՆ ՆՍՏԱՇՐՋԱՆ

Սեպտեմբերի 6-ից մինչև 9-ը Երևանում տեղի ունեցավ հայ-ուկրաինական պատմական կապերին նվիրված գիտական նստաշրջանի պատիվ Հոկտեմբերյան հեղափոխության 50-ամյակի, Գիտական նստաշրջանը կազմակերպել էին Հայկական ՍՍՀ և Ուկրաինական ՍՍՀ գիտությունների ակադեմիաների պատմության ինստիտուտները. Երևանի Մեսրոպ Մաշտոցի անվան մատենադարանը և Լվովի Ի. Ֆրանկոյի անվան համալսարանի հասարակական գիտությունների ինստիտուտը: Նստաշրջանի աշխատանքներին մասնակցելու համար Կիևից, Լվովից, Մոսկվայից և այլ քաղաքներից Երևան էին ժամանել մեծ թվով պատմաբաններ:

Հակիրճ ելույթով նստաշրջանը բացեց Հայկ. ՍՍՀ ԳԱ պրեզիդենտ Վ. Համբարձումյանը:

Ուկրաինայի և Հայաստանի գիտնականները, առաջ նա, գիտահետազոտական համատեղ աշխատանքի լավագույն ավանդույթներ ունեն: Դեռևս 1954 թ., Ռուսաստանի հետ Ուկրաինայի վերամիավորման 300-ամյակի տոնակատարության օրերին, Հայաստանի գիտությունների ակադեմիան լույս ընծայեց «Մեծ բարեկամություն» վերնագրով ժողովածուն, որսեղ զետեղված են ուկրաինացի և հայ գիտնականների աշխատությունները՝ նվիրված երկու ժողովուրդների պատմական կապերին: Հետագա տարիներին Երևանում, Կիևում և Լվովում անցկացվեցին գիտական նստաշրջաններ նույն հարցի վերաբերյալ:

Մենք երախտագիտությամբ ենք նշում, շարունակեց Վ. Համբարձումյանը, այն ուշադրությունը, որ ուկրաինացի գիտնականները նվիրում են ուկրաինա-հայկական պատմական և ներկայումս գոյություն ունեցող կապերին: Մենք խորին շնորհակալությամբ ու երախտագիտությամբ ենք տոգորված ուկրաինական ժողովրդի նկատմամբ, որի հյուրընկալության, մարդասիրության և բարյացակամության շնորհիվ տասնյակ հազարավոր հայեր ապաստան գտան, ապրելու ու աշխատելու հնարավորություն ստացան:

Հայաստանի Կոմկուսի Կենտկոմի և Հայկական ՍՍՀ Մինիստրների սովետի անունից գիտաշրջանի մասնակիցներին ողջունեց ՀԿԿ Կենտկոմի քարտուղար Ռ. Խաչատրյանը:

— Ուկրաինական և հայ ժողովուրդները իրենց սեփական փորձով են գիտակցել Հոկտեմբերյան հեղափոխության դերն ու նշանակությունը, հեղափոխություն, որը նրանց բերեց սոցիալական ու ազգային ազատություն, լայն ասպարեզ տվեց ստեղծագործական ուժերին, իսկական վերածնունդ ապահովեց նրանց համար:

Այնուհետև ընկ. Ռ. Խաչատրյանը կանգ առավ մեր պատմաբանների առջև ՍՄԿԿ XXIII համագումարի դրած մեծ խնդիրների վրա, նստաշրջանի մասնակիցներին ցանկացալ հաջող և արդյունավետ աշխատանք:

Առաջին պլենար նիստում լսվեց շորս զեկուցում: Ուկրաինական ՍՍՀ ԳԱ պատմության ինստիտուտի գիրեկտոր, պատմական գիտությունների դոկտոր Կ. Կ. Դուրինայի և պատմական գիտությունների թեկնածու Բ. Պ. Կովալևսկու համատեղ զեկուցումը նվիրված էր Հոկտեմբերյան հեղափոխության վճռական նշանակությանը ուկրաինական ժողովրդի պատմական ճակատագրում: Հեղինակները ցույց տվեցին, որ հեղափոխությունը ուկրաինական ժողովրդին տվեց ոչ միայն սոցիալական ազատություն, այլև ազգային պետականություն և ինքնուրույնություն: Զեկուցման մեջ փաստեր բերվեցին այն մասին, որ Ուկրաինայում սովետական կարգերի հաստատման համար մղված պայքարում նշանակալի ավանդ են մուծել նաև հայ ժողովրդի զավակները: Քաղաքացիական պատերազմի հերոս Գ. Ոսկանյանի զխավորությամբ 12-րդ բանակը 1920 թ. Ուկրաինայի մայրաքաղաք Կիևը ազատագրեց սպիտակ լեհերից: Օտարերկրյա ինտերվենցիայի դեմ մղված պայքարում ակտիվ մասնակցություն են հանդես բերել նաև բրիգադի հրամանատար Գ. Խախանյանը, 3-րդ հեծյալ կորպուսի հրամանատար Հ. Բոշկյանը (Գայ): Ուկրաինայում կուսակցական-քաղաքական և ռազմական մեծ աշխատանք է կատարել Ալ. Մյասնիկյանը: Նույն ձևով էլ Ուկրաինայի զավակները մարտնչել են Հայաստանում սովետական կարգեր հաստատելու համար:

Դրանցից լայնորեն հայտնի են 11-րդ բանակի հրամանատարներ Մ. Ի. Վասիլենկոյի, Ի. Ֆ. Ֆեդկոյի, դիվիզիայի հրամանատար Պ. Կուռիչկոյի, դնդերի հրամանատարներ Ի. Ռ. Ապանասենկոյի, Գ. Գրեչուխայի և ուրիշ շատերի անունները:

Զեկուցման հեղինակները բաղձաթիվ փաստերի միջոցով ցույց տվեցին Ուկրաինայի տնտեսության, մշակույթի և գիտության աննախընթաց վերելքը 50 տարում:

Հայկ. ՍՍՀ ԳԱ ակադեմիկոս Ս. Տ. Երեմյանի զեկուցման թեման էր «Եվրոպական Սարմաթիան ըստ Պտղոմեոսի և VII դարի հայկական աշխարհագրության», Ուկրաինայի և նրա հարևան երկրների աշխարհագրական նկարագրությունը տրված է Պտղոմեոսի «Աշխարհագրական ձեռնարկի» «Եվրոպական Սարմաթիա» գլխում: Գիտնականը ցույց տվեց, որ նշված երկրամասը նկարագրված է նաև «Աշխարհացույցում»:

— Պատմական գիտությունների դոկտոր Ֆ. Պ. Շևչենկոն (Կիև) զեկուցեց XVII—XVIII դարերում ձախափնյա Ուկրաինայի և Զապորոժյան Սևչի հետ Ղրիմի ունեցած տնտեսական կապերում հայերի խաղացած դերի մասին: Ղրիմի հայ վաճառականները իրենց ձեռքում էին պահում առևտրի մենաշնորհը: Չնայած այդ շրջանում տիրող միջազգային բարդ պայմաններին, հայ վաճառականները աշխույժ առևտուր էին անում Ուկրաինայում, Ղրիմում և Ռուսաստանում, դրանով իսկ ազդելով արտաքին քաղաքական հարաբերությունների վրա:

Պլենար նիստի վերջում «Ուկրաինայի և Հայաստանի զավակների համագործակցությունը Հոկտեմբերի հաղթանակի համար մղված մարտերում» թեմայով զեկուցեց պատմական գիտությունների դոկտոր Ա. Ն. Մնացականյանը: Զեկուցողը նշեց, որ Ռուսաստանում տեղի ունեցած Հոկտեմբերյան հեղափոխությունը, ցարիզմի կողմից ճնշված ազգերի ազատագրման մասին լենինյան դեկրետները, ինչպես նաև Ուկրաինայի և Հայաստանի վերաբերյալ 1917 թ. հռչակված լենինյան ազգային քաղաքականության սկզբունքները դրեցին ազգային հարցի հեղափոխականորեն լուծման հիմքերը:

Հայ և ուկրաինացի ժողովուրդների լայն զանգվածները ոգեշնչվել էին մեծ Հոկտեմբերի ազատատենչ զաղափարներով: Երկու ժողովուրդների զավակները ակտիվորեն մասնակցում էին Հոկտեմբերյան հեղափոխության հաղթանակի համար մղվող պայքարին: Ուկրաինայում և Ղրիմում հեղափոխության համար պայքարում էին հայազգի Մ. Տեր-Արծրունյանցը, Պերճ Պողոսյանի որդին՝ Պոռո Պողոսյանը, Գասպար Ոսկանյանը և շատ ուրիշներ: Ուկրաինացիներն իրենց հերթին անձնագոհ կերպով մարտնչեցին թուրքական զավթիչներից Հայաստանն ազատագրելու և երկրում սովետական կարգեր հաստատելու համար:

Պլենար նիստից հետո գիտական նստաշրջանի աշխատանքները շարունակվեցին երեք սեկցիաներում:

Նոր և սովետական շրջանի պատմության սեկցիայում առաջինը զեկուցեց պատմական գիտությունների թեկնածու Վ. Պ. Սիդորենկոն (Կիև): Նրա թեման էր՝ «Կիև և Երևան քաղաքների մրցությունը»: Բաղձաթիվ փաստերի վկայակոչմամբ նա ցույց տվեց, որ Ուկրաինայի և Հայաստանի մայրաքաղաքների միջև ծավալված սոցիալիստական մրցությունը ավելի ամրապնդեց երկու քաղաքների աշխատավորության համագործակցությունը, նրանց բոլոր ջանքերը ուղղեց սոցիալիզմի կառուցումն ավարտելու և կոմունիզմի ծավալուն շինարարությանն անցնելու գործին:

Նիստում ընթերցվեց պատմական գիտությունների դոկտոր Խ. Հ. Բարսեղյանի զեկուցումը նվիրված ուկրաինական և հայ ուսանողության հեղափոխական կապերի պատմությանը: Զեկուցումից պարզվեց, որ Կիևում, Խարկովում, Նիկոլաևում, Օդեսայում և Ուկրաինայի այլ քաղաքների ուսումնական հաստատություններում սովորող հայ հեղափոխական ուսանողները սերտ կապեր էին հաստատել ուկրաինացի մարքսիստ ուսանողների հետ, որը նպաստեց մարքսիստական գաղափարների տարածմանը Հայաստանում:

Այնուհետև կարդացվեցին հետևյալ զեկուցումները. «Լյուդվիգ Կնունյանցի բոլշևիկյան հրապարակախոսությունը «Կիևսկոյե սլովո» պարբերականում 1905 թ. (պատմ. գիտ. թեկն. Վ. Գ. Սադրեյ, Կիև), «409-րդ Հայկական Կիրովոգրադյան հրաձգային դիվիզիան Ուկրաինայի ազատագրման համար մղված մարտերում: 1943—1944 թթ.» (պատմ. գիտ. թեկն. Ա. Հ. Հարությունյան), «Ուկրաինայի արևմտյան մարզերի ժամանակակից հայ բնակչության կազմի մասին» (տնտ. գիտ. թեկն. Գ. Ի. Կովալչակ, Լվով), «Ուկրաինայի և Հայաստանի գիտական կապերը 1924—1932 թթ.» (պատմ. գիտ. թեկն. Մ. Ֆ. Դմիտրենկո, Կիև), «Ուկրաինական ժողովրդի օգնությունը հայ զաղթականներին 1916—1921 թթ.» (պատմ. գիտ. դոկտ. Ս. Տ. Ալիխանյան) և այլն:

Ֆեոդալական ժամանակաշրջանի պատմության սեկցիայում կարդացվեց 8 զեկուցում: Արվեստագիտության թեկնածու Մ. Մ. Ղազարյանի զեկուցումը նվիրված էր XVI—XVII դդ. Լվովի

հայ նկարիչների գործունեության պատմությանը: Մ. Ղազարյանը ցույց տվեց, որ միջնադարյան լվովի հայկական գեղարվեստը թեև իր գեղարվեստական դեմքով առնչվում է ավրոպական բարոկկոյին և կրում է լվովի տեղական գեղարվեստի կնիքը, բայց նայելիս նա ունի որոշակի արտահայտված հայկական կոլորիտ:

Ուկրաինական դոմանների և հայկական պատմական ողբերի տիպոլոգիական ընդհանրությունների մասին զեկուցեց Ս. Գ. Ամիրյանը: Զուգահեռներ անցկացնելով դոմանների և ողբերի միջև, նա նկատեց, որ դրանք երկուսն էլ ժողովրդական պայքարի բանաստեղծական հուշարձաններ են, որոնք արտահայտվել են ողբերգական ձևերով:

Այդ նույն սեկցիայում կարդացվեցին զեկուցումներ նաև Արևմտյան Ուկրաինայի և Մոլդավիայի տնտեսական կապերի զարգացման գործում (XV—XVII դդ.) մոլդավահայ զաղութների խաղացած դերի (պատմ. գիտ. թեկն. Ե. Մ. Պողոթնադսկայա: Քիշնև), Ուկրաինայի և Հեհաստանի հայ զաղութներում կնոջ իրավական դրության (պատմ. գիտ. թեկն. Վ. Ռ. Գրիգորյան), լվովի հայ զաղութի XVII դարի երկրորդ կեսի պատմության (պատմ. գիտ. թեկն. Ն. Կ. Կրիվոնոս: Լվով), Բրոդի քաղաքի հայ զաղութի (պատմ. գիտ. թեկն. Յա. Ս. Մելնիշուկ: Իվանովո-Ֆրանկովսկ), թուրք-թաթարական զավթիչների գեմ ուկրաինական ժողովրդի մղած պայքարում հայերի ունեցած վերաբերմունքի (պատմ. գիտ. թեկն. Մ. Լ. Հովհաննիսյան), միջնադարյան հայ-ուկրաինական կապերի պատմական նշանակության (պատմ. գիտ. թեկն. Վ. Կ. Ոսկանյան) մասին:

Պատմագրության, աղբյուրագիտության և բիբլիոգրաֆիայի սեկտորում լսվեցին մի շարք հետաքրքիր զեկուցումներ: Պատմ. գիտ. դոկտոր Ռ. Բ. Սիմոնենկոն (Կիև) քննադատեց բուրժուական գաղափարախոսներին այն բանի համար, որ նրանք փորձում են ինչ-որ ստվերոտ կողմեր գտնել ուսու և ՍՍՀՄ մյուս ժողովուրդների փոխհարաբերություններում: Սակայն անցած 50 տարում, ասաց զեկուցողը, մեր ժողովուրդների ձեռք բերած վիթխարի նվաճումները սնանկացման են դատապարտում բուրժուազիայի ժամանակակից գաղափարախոսների նմանօրինակ փորձերը:

«Թուրք-թաթարական ասպատակությունները Ուկրաինայում XVI—XVIII դարերում ըստ հայկական աղբյուրների» — այսպիսին էր պրոֆ. Ա. Գ. Աբրահամյանի զեկուցման թեման: Հայկական աղբյուրներից բերված բազմաթիվ փաստերով նա ցույց տվեց թուրք-թաթարական զավթիչների կողմից ուկրաինական ժողովրդի նկատմամբ կիրառված հալածանքի և մասսայական ոչնչացման քաղաքականությունը:

Այս սեկցիայում կարդացված մյուս զեկուցումները նվիրված էին լվովի XVI—XVII դդ. արխիվային հայկական փաստաթղթերի ֆիլիգրանների նշանակությանը (օ. Յու. Մացյուկ: Լվով), Գրիգորիոսյանի հայերի և ուկրաինացիների միջև 1793 թ. կնքված պայմանագրին (պատմ. գիտ. թեկն. Ժ. Ա. Անանյան), հայ զրքի տպագրությանը միջնադարյան լվովում (Ն. Ա. Ոսկանյան և պատմ. գիտ. թեկն. Կ. Ա. Կորկոտյան), հակաուսիատական շարժման վերաբերյալ Առաքել Դավրիժեցու հաղորդած տվյալներին (Բ. Պ. Պինգիրյան) և այլ հարցերի:

Սեկցիաների նիստերից հետո կայացավ եզրափակիչ պլենար նիստը: Այստեղ հանդես եկած պրոֆ. Մ. Ա. Ռուբաչը (Կիև) խոսեց Հոկտեմբերյան հեղափոխության հաղթանակի համար մղված մարտերում ուկրաինացիների, բելոռուսների, հայերի, վրացիների, լատիշների և մյուս ազգերի ակտիվ մասնակցության մասին: Հոկտեմբերյան հեղափոխությունը ազատագրեց Ռուսաստանի ճնշված ժողովուրդներին կապիտալիստների և կալվածատերերի լծից, անհրաժեշտ պայմաններ ընձեռեց սովետական սոցիալիստական պետություն ստեղծելու, սովետական հանրապետությունների արտադրողական ուժերը արագ զարգացնելու, մշակույթի աննախընթաց ծաղկման հասնելու համար:

Հայկ. ՍՍՀ ԳԱ ակադեմիկոս Ա. Բ. Կարինյանը իր զեկուցումը նվիրեց Տ. Շևչենկոյի, Ի. Ֆրանկոյի և Կոցյուբինսկու ստեղծագործություններին և դրանց արտացոլմանը հայ գրականության ու հասարակական մտքի մեջ: XIV—XVI դդ. Ուկրաինայի և Մերձավոր արևելքի հայ զաղութների պատմության աղբյուրների բնութագրման հարցի, կոմունիզմի կառուցման շրջանում հայ և ուկրաինացի ժողովուրդների համագործակցության մասին խոսեցին իրենց զեկուցումներում պատմ. գիտ. թեկնածուներ Յա. Գ. Իսաևիչը (Լվով) և Վ. Ֆ. Պանիրուլյանկան:

Վերջում գիտական նստաշրջանի աշխատանքները ամփոփեց Հայկ. ՍՍՀ ԳԱ պատմության ինստիտուտի գիրեկտոր, պրոֆ. Գ. Ա. Գալոյանը:

Մ. ՀՈՎՀԱՆՆԻՍՅԱՆ